

- 1 alġat rbbi ašku nttan a-ifulkin,
ar-bdda-iskar s-lġnant-ns izgan.
- 2 alġat rbbi kunni lli-ijjnjm,
ikks-kn-d i-lhalak ig-kn ġ-laman.
- 3 issmun-kn-d kullukn zġ-tmizar agguġnin,
yaw-i-kn-d zġ-użlmaġ ula afasi,
zġ-uşġlay n-tafukt ar amtar-ns.
- 4 kra gigun ar-itlulli ġ-şşahra iħwan.
ur-ufin tamdint ma-ġ-a-tgguzn.
- 5 itġaşa-uwl-nsn tdr-tdwast-nsn,
inġ-tn irifi ula laż iggutn.
- 6 ġ-tnukmut-an ad-ġran i-sidi rbbi,
hati ijjnjm-tn zġ-taġuft-nsn.
- 7 yawi-tn ħayna ġ-yan-uġaras inmn,
aylliġ ruħn tamdint lli-ġ-rad-zdġn.
- 8 ad-alġn rbbi f-lġnant-ns da-izgan,
d-lejayb da-iskar f-ssibt n-bnadm.
- 9 ar-isswa rbbi kullu wanna yaġ irifi,
ar-işşbaġ s-lġir wanna inġa laż.
- 10 kra gigun ityawkrraf s-ssnasl n-uwzzal,
rfufnn ġ-tillas d-umalu l-lmut.
- 11 ġin a-ġ-qaman ašku ešan rbbi,
ħgrn ntni luşiyat n-walli yattuyn.

- 12 issizzay flasn anhataf işqan,
đrn s-wakal laħ ma-tn-itġawann.
- 13 ġ-tnukmut-an ad-ġran i-sidi rbbi,
hati ijjnjm-tn zġ-taġuft-nsn.
- 14 issufġ-tn-d zġ-tillas ula amalu l-lmut,
ibbi ssnasl-nsn irzm-asn.
- 15 ad-alġn rbbi f-lġnant-ns da-izgan,
d-lejayb da-iskar f-ssibt n-bnadm.
- 16 ar-irzza rbbi iflwan n-wanas,
ar-itbbi ula ifggign n-uwzzal.
- 17 kra gigun iwrri inufl s-ddnub-ns,
hrşn ašku ffuġn zġ-iwaliwn n-rbbi.
- 18 krhun amşšu akmurn-in s-lmut.
- 19 ġ-tnukmut-an ad-ġran i-sidi rbbi,
hati ijjnjm-tn zġ-taġuft-nsn.
- 20 yazn-d awal ħayna ijuji-tn,
ikks-tn-d i-lhalak n-umđdal illasn.
- 21 ad-alġn rbbi f-lġnant-ns da-izgan,
d-lejayb da-iskar f-ssibt n-bnadm.
- 22 ad-fkn i-rbbi tiwafkiw n-şşukr,
ar-ttirirn bdrn kullu iskkirn-ns.

- 23 ar-ssudun wiyyaġ ġ-wanawn f-imdwan,
ar-saġn ar-zznzan ġ-tama n-waman.
- 24 ġ-umda idran a-ġ-zran lejayb n-rbbi,
ġin a-ġ-ssmaqqln jġhd n-iskkirn-ns.
- 25 yazn-d awal yawi-d aġu itjħhdn,
issduy amda issattuy tađangiwin.
- 26 ar-aqlayn ar iggi ar-tgguzn ar izdar,
ġuwġn bahra akmurn ad-ħsin.
- 27 ar-tmlilin ar-ttarn zund iskayriyn,
duhdun ur-akk^w-ssinn ma-rad-skrn.
- 28 ġ-tnukmut-an ad-ġran i-sidi rbbi,
hati ijjnjm-tn zġ-taġuft-nsn.
- 29 issfsa aġu issbidd tađangiwin,
- 30 isshnnu ul-nsn s-umda izgan.
yaw-i-tn ġ-laman ar lmrša lli-ran.
- 31 ad-alġn rbbi f-lġnant-ns da-izgan,
d-lejayb da-iskar f-ssibt n-bnadm.
- 32 ad-mjġdn rbbi ġ-gr willi-t-itġbadn,
ħmdn-t ġ-umnaggar n-imġarn n-mddn-ns.
- 33 issruħ-d taġart i-isaffn n-waman,
irar talġinin gnt ig^wđyan irufan.
- 34 lliġ izra lħşant n-willi ġin zdġnin,
irar akal işwan ig amlal imarġn.
- 35 ifk talġinin i-şşahra irufan,
irar lburr iqqurn ig timdiwin n-waman.

- 36 yawi-d s-wakal-an ġwilli inġa laż,
bnun yat-tmdint a-gis-zdġn.
- 37 awin-d amud zzun asġar n-wađil,
asin timiħar zġ-igran-nsn.
- 38 ibark-tn rbbi igatn darsn tarwa,
ur-yudji aţtan a-ilkm lksibt-nsn.
- 39 lliġ đrn ntni nrun-tn ayt-imig,
knun ġ-ddu tazayt n-tkrrayt ula
tarfufnt,
- 40 issufġ rbbi ġwilli flasn itak^wln,
yazn-tn ad-ġlun ġ-lħla yaggugn.
- 41 ikks-d ġwilli đfnin i-tnukmut işqan,
issigt-asn tarwa zund lksibt-nsn.
- 42 frħn ayt-ufulki s-mayd iskr rbbi,
imma ayt-lħşant laħ-asn ma-ttinin.
- 43 yan dar leaql, a-stt-yawi ġ-kullu mayad,
iswangm ġ-lġnant n-rbbi da-izgan.